



## *Erindisbréf fyrir skólanefnd Bláskógabyggðar.*

### **I. kafli Almenn ákvæði**

#### 1. gr.

Skólanefnd er skipuð af sveitarstjórn Bláskógabyggðar skv. 6. gr. laga nr. 91/2008 um grunnskóla og 2. mgr. 4. gr. laga nr. 90/2008 um leikskóla. Er nefndinni ætlað að vinna að fræðslumálum í Bláskógabyggð.

Skólanefnd skal starfa samkvæmt fyrrgreindum lögum, erindisbréfi þessu, sem sveitarstjórn hefur staðfest og almenningur skal hafa greiðan aðgang að, samþykktum sveitarfélagsins og V. kafla sveitarstjórnarlaga nr. 138/2011. Nefndin skal starfa að öðru leyti eftir því sem lög og reglugerðir kveða á um og sveitarstjórn felur henni.

#### 2. gr.

Skólanefnd er skipuð fimm aðalmönnum og jafnmörgum til vara. Nefndin skiptir með sér verkum, kys varaformann og ritara. Formaður er kosinn af sveitarstjórn.

Samkvæmt 4. mgr. 6. gr. grunnskólalaga og 9. gr. leikskólalaga kjósa leikskólastjórar, skólastjórar, starfsfólk leikskóla, grunnskólakennarar og foreldrar leikskólabarna og grunnskólabarna í sveitarfélaginu hver úr sínum hópi aðal- og varamann til setu á skólanefndarfundum með málfrelsi og tillögurétt. Einnig á sveitarstjóri seturétt á fundum nefndarinnar.

#### 3. gr.

##### **Markmið.**

Markmið með starfi skólanefndar er að vinna að fræðslumálum í sveitarfélaginu, einkum og sér í lagi í tengslum við þær menntastofnanir sem reknar eru af sveitarfélaginu. Nefndin skal leitast við að ná því grundvallarmarkmiði að tryggja að ákvarðanir hennar og vinna séu fyrst og fremst í þágu allra íbúa sveitarfélagsins sem leggur þær skyldur á herðar fulltrúum í nefndinni að setja ávallt almannahagsmuni ofar sérhagsmunum hvort heldur er sínum eigin eða einstakra hópa.

Í störfum sínum skal nefndin taka mið af þeim lögum og reglugerðum, sem um fræðslumál gilda, sérstaklega þó lögum sem um leik- og grunnskóla gilda hverju sinni. Þá skal nefndin fylgja samþykkt um stjórn og fundarsköp Bláskógabyggðar eins og hún er hverju sinni og kynna sér ákvæði sveitarstjórnarlaga.

#### 4. gr.

##### **Hlutverk.**

Skólanefnd hefur faglega umsjón með starfsemi leik- og grunnskóla í sveitarfélaginu. Nefndin skal hafa eftirlit með því að stofnanir og deildir starfi innan ramma laga, reglugerða og samþykpta á hverjum tíma.

Skólanefnd er ráðgefandi nefnd sem gerir tillögur til sveitarstjórnar. Nefndin getur enga bindandi ákvörðun tekið nema með samþykki sveitarstjórnar, enda hafi nefndinni ekki áður verið falin fullnaðarafgreiðsla einstakra mála, eða slíkt sé leitt af lögum um leik- eða grunnskóla.



Helstu hlutverk nefndarinnar eru:

- að vera sveitarstjórn til ráðgjafar í málefnum leik- og grunnskóla;
- að gera tillögur til sveitarstjórnar um skólastefnu Bláskógabyggðar;
- að hafa eftirlit með að ákvæði laga og reglugerða séu uppfyllt, þ.m.t. ákvæði laga um leikskóla, nr. 90/2008, laga um grunnskóla, nr. 91/2008 og reglugerða, sem settar eru á grundvelli þeirra, og gerir tillögur til sveitarstjórnar um úrbætur;
- að vinna samkvæmt samþykktum markmiðum í málefnum leik- og grunnskóla, og gera tillögur um útfærslu þeirra til sveitarstjórnar;
- að sjá um að öll skólaskyld börn sem rétt eiga á skólavist í sveitarfélaginu njóti lögboðinnar fræðslu;
- að fylgjast með þörf fyrir leikskólaláss í sveitarfélaginu;
- að fylgjast með framkvæmd náms og kennslu í Bláskógabyggð og gera tillögur til skólastjóra og/eða sveitarstjórnar um umbætur í skólastarfi.
- að staðfesta starfsáætlanir leikskóla og grunnskóla ár hvert og skólanámskrá einstakra leik- og grunnskóla;
- að fylgjast með og stuðla að því að nemendum og skólum sé tryggður aðgangur að skólaþjónustu;
- að stuðla að tengslum og samstarfi leikskóla og grunnskóla annars vegar og og grunnskóla og framhaldsskóla hinsvegar;
- að gæta þess að leik- og grunnskólar á vegum Bláskógabyggðar búi við fullnægjandi húsnæði og að annar aðbúnaður sé fyrir hendi;
- að fara með málefni bókasafna sveitarfélagsins.

Hlutverk skólanefndar er nánar skilgreint í lögum um leik- og grunnskóla.

## II. kafli

### Fundir og starfshættir.

#### 5. gr.

##### *Boðun funda.*

Formaður boðar til funda svo oft sem þurfa þykir og stjórnar þeim. Að jafnaði skal miðað við mánaðarlega fundi, en þó ekki sjaldnar en sex sinnum á ári.

Boðað skal til fundar í skólanefnd ef skólastjóri eða að minnsta kosti tveir nefndarmenn óska eftir því enda sé fundarefni tilgreint. Hver fulltrúi á rétt á að koma máli á dagskrá fundar, enda skili hann efni þess til formanns a.m.k. þremur sólarhringum fyrir fund.

Fundarboðun skal vera skrifleg og tilgreina fundarstað, tíma og dagskrá. Fundarboð skal sent fulltrúum og öðrum sem seturétt hafa á fundum eigi síðar en tveimur sólarhringum fyrir fund. Nefndinni er heimilt að ákveða að fundir verði boðaðir með rafrænum hætti.

Til fundar telst löglega boðað hafi allir nefndarmenn, eða varamenn í forföllum þeirra, ásamt þeim sem seturétt eiga á fundunum, verið boðaðir með a.m.k. tveggja sólahringa fyrirvara og þeim jafnframt greint frá dagskrá fundarins. Komi upp mál sem krefst skjótrar úrlausnar getur fyrirvari um fundarboðun verið skemmri ef enginn nefndarmanna mælir gegn því. Fundir nefndarinnar skulu að jafnaði haldnir fyrir luktum dyrum. Nefndin getur boðað á sinn fund starfsmenn sveitarfélagsins ef hún telur þess þörf. Einnig getur hún boðið öðrum aðilum að koma á fund nefndarinnar til viðræðna um ákveðin mál.



## 6. gr.

**Réttindi og skyldur.**

Nefndarmönnum er skylt að sækja fundi skólanefndar nema lögmæt forföll hamli. Nefndarmaður sem er forfallaður skal láta formann vita um forföll með góðum fyrirvara og boða staðgengil sinn.

Þeir sem sitja fundi nefndarinnar skulu gæta fyllsta trúnaðar um þau einkamál er rædd kunna að vera á fundum hennar. Þagnarskylda helst þótt látið sé af störfum. Skulu allir sem sitja fundi skólanefndar undirrita trúnaðaryfirlýsingu sem geymd er í vörslu formanns milli funda. Á nefndinni hvílir einnig upplýsingaskylda til þeirra er senda nefndinni erindi, ber formanni að sjá til þess að skrifstofa sveitarfélagsins sendi viðkomandi aðila niðurstöðu fundar.

Um réttindi og skyldur fulltrúa í skólanefnd gilda ákvæði sveitarstjórnarlaga og samþykktar um stjórn og fundarsköp Bláskógabyggðar, eftir atvikum.

## 7. gr.

**Ályktunarhæfi.**

Skólanefnd getur enga ályktun gert nema meirihluti hennar sitji fund og löglega hafi verið til hans boðað. Í atkvæðagreiðslu ræður afl atkvæða. Mál telst fallið í atkvæðagreiðslu ef atkvæði falla að jöfnu.

Um sérstakt hæfi nefndarmanna og áheyrnarfulltrúa gilda ákvæði sveitarstjórnarlaga. Fulltrúi skal víkja af fundi við umræður og afgreiðslu mála sem varða hann sjálfan, skyldmenni hans eða nánustu venslamenn svo mjög að ætla má að það móti viljaafstöðu hans að einhverju leyti. Honum er þó heimilt að gera stuttlega grein fyrir afstöðu sinni áður en hann víkur af fundi.

## 8. gr.

**Fundargerðir.**

Rita skal í fundargerðabók öll mál sem fjallað er um í skólanefnd og skulu allir fundarmenn rita nöfn sín undir fundargerðina. Heimilt er að rita fundargerð beint í tölvu. Með fundargerðir fer að öðru leyti skv. 19. gr. sveitarstjórnarlaga.

Fundargerðabók, afrit af skýrslum og skjölum skólanefndar, lög, reglugerðir og erindisbréf skulu vera tiltæk á öruggum stað. Formaður skal sjá um að afrit af fundargerðum nefndarinnar séu send sveitarstjórn til kynningar og/eða samþykktar að loknum hverjum fundi. Sveitarstjórn sér um birtingu fundargerða nefndarinnar á vef sveitarfélagsins.

Nefndin heldur sérstaka trúnaðarmálabók, þar sem skráð er afgreiðsla mála er varða einkahagi og persónuleg mál. Bók þessi skal geymd á öruggum stað í vörslu formanns, ásamt öðrum þeim gögnum sem varða afgreiðslu slíkra mála. Slík mál skulu ekki skráð í almenna fundargerðabók nefndarinnar.

## 9. gr.

**Meðferð mála.**

Skólanefnd skal á fundum sínum taka fyrir öll þau erindi sem berast henni, fjalla um þau og gera tillögur um afgreiðslu þeirra til sveitarstjórnar, nema sveitarstjórn hafi falið henni fullnaðarafgreiðslu málsins sbr. 4. gr. erindisbréfs þessa. Þá skal formaður, strax að lokinni afgreiðslu, tilkynna málsaðilum niðurstöður málsins sé mál þannig vaxið.



Staðfest af sveitarstjórn Bláskógabyggðar þann 16. apríl 2020.

Valdísur Karason

Halkeida Sveinþórunn

Róbert Árnir Palmason

Þórunn

Þórunn

Guðrún S. Magnúsdóttir

Helga Hjartarson